



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

*Komunikadu Imprensa
Tribunál Distritál Baucau*

5 Novembru 2013

Ministériu Públiku promove pena fulan 3 suspende ba fulan 6 iha kazu violénsia doméstika

Iha 4 Novembru 2013, Tribunál Distritál Baucau julga arguidu MLS ne'ebé prátika krime hasoru nia feen, ne'ebé akontese iha Distritu Manatuto.

Ministériu Públiku akuza katak iha 1 Juñu 2011, maizumenus tuku 10:30 kalan, arguidu diskuti malu ho lezada kona-ba problema pasadu no foti ai baku iha lezada nia liman karuk no kotuk laran. Arguidu nia hahalok rezulta lezada nia liman karuk no kotuk laran bubu no moras no konsege halo tratamentu iha klinika.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples kónjuga ho artigu 35 alinea (b) Lei Kontra Violénsia Doméstika.

JSMP hanoin katak alegasaun Ministériu Públiku la releta artigu 68 alinea 1 Kódigu Penál (KP), tanbá iha artigu ne'e haktuir katak tribunál bele suspende pena prizaun aplikada ne'ebé la aas-liu tinan 3 nia ezekusaun durante tinan 1 too tinan 5. Maibé iha kazu ne'e, Ministériu Públiku husu suspensaun ba pena prizaun ne'ebé menus husi tinan 1.

“JSMP hanoin katak suspensaun ba pena prizaun fulan 6 la releta rekeztus legál tuir artigu 68 (1) KP no la motiva autór krime violénsia doméstika sira atu muda sira nia atitude iha futuru”, dehan Diretór Ezekutivu JSMP, Luis de Oliveira Sampaio.

Iha audiénsia arguidu konfesa faktus ne'ebé akuza husi Ministériu Públiku. Arguidu deklara katak nia arepende nia hahalok, sira dame malu ona no promete iha futuru sei la halo tan hasoru lezada no ema seluk.

Tanba arguidu konfesa faktu sira, tribunál deside atu la rona deklarasaun lezada no testamuña. Iha alegasaun finál, Ministériu Públiku husu ba tribunál atu konsidera sirkustánsia atenuante jerál, nune'e husu tribunál atu kondena arguidu ho pena prizaun fulan 3 suspende ba fulan 6.

Iha defeza nia konkluziun husu ba tribunál atu absolve arguidu husi kazu ne'e, tanbá arguidu konfesa faktus sira, arepende ba nia hahalok, laiha antesidentes kriminais no dame malu ona ho lezada.

Kazu julga ho Númeru Prosesu 188/Crm.S/2012/TDB. Julgamentu ne'e prejiude husi juis singular Dr. Hugo da Cruz Pui (Juiz Estajiadu), Ministériu Públiku representa husi Dr. Aderito Tilman no arguidu hetan defeza husi Dr. Grigorio de Lima husi Defensória Públiku.

Prosesu ne'e sei kontinua fali iha 13 Novembru 2013 iha tuku 10:00 dadersan, atu rona desizasaun finál.

Atu hetan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl